

Vun driweriwer

erscheint auf www.lenauheim.de

monatliche
Erscheinung

März 2015

von *Helen Alba*

Siewe Johr Pech - Awerglaawe oder nit?

Während meim Aufenthalt in Deitschland war ich mol do mol dort. Des heescht halt reihum bei de Kiner. Bei meiner Tochter, em Simone, do hat de Spiegel im Badezimmer schief ghong. Ich hans druf ufmerksam gemacht, doch es hat nor abgewehrt un gement: „Der hat immer schun so ghong. Riehr ne nor nit an, sunscht kennt der runnerfalle un amend breche!“ Natierlich han mer uns ghiebt, an dem Spiegel was zu mache. Un in eener Nacht, wie ich ins Badezimmer geh, war die Bescheerung do: De Spiegel war direkt ins Waschbecken gfall un gebroch. Die Erd war voller Splitter. Was jetz mache? Schnell han ich mei Mann ufgeweckt. Erscht hat der länger als e Stund die Splitter zammgerafft, dass mer nit noch nintrete. Mir han doch die junge Leit nit wackrich mache wille, weil die jo morjets in die Arweit han misse. Wie mer alles zammgerafft un wechgeraamt ghat han, war finf Uhr morjets un an Schlof ware nimi zu denke. Es Simone war froh, dass Ordnung im Badezimmer war un nit meh passiert is. Doch ich han mer dauernd de Kopp verbroch, weil es werd doch gsaat, dass es siewe Johr Unglick bringt, wann e Spiegel brecht. Derezeit sin schun phaar Wuche ins Land gezoo un ich han anfang im Internet zu suche, was des mitm gebrochene Spiegel uf sich hat. Dass ich informiert sin, sellt mol wieder so was passiere. Un han rausgunn:

Mer soll Salz iwer die Scherwe streije, die jo nit zammkehre; oder Salz iwer die linksi Schiller werfe, dreimol spautze un uf eem Been dorch die Stub hupse; wann mer die Scherwe 24 Stunde lang nit anriehrt un leije losst, soll mer nor siewe Täch lang Unglick han;

Der Ausspruch, dass e gebrochene Spiegel Pech bringe soll, der kummt aus friehriche Zeite, in dene e Spiegel sehr teijer war un mer siewe Johr dran zu knawwre ghat hat, bis mer sich e neije hat kaafe kenne.

Es werd ach gsaat, wann e Spiegel brecht, brecht a e Stick vun der Seel. Un es dauert siewe Johr, bis es Seeleheil wieder in Ordnung is; de Spiegel is es Tor zur Geischerwelt. Un wann des Tor brecht, were die Geischer rewellich.

Zwar sin ich jetz um etwas schlauer, doch wer ich mich trotzdem in Zukunft hiete un trachte, jo nix mit eem gebrochene Spiegel zu tun han.